

法制



內務部頒布暫行報律電文

上海中國報界俱進會轉全國新聞雜誌各社知照民國完全統一前清政府頒布一切法令非經民國政府聲明繼續有效者應失其效力查滿清行用之報律軍興以來未經民國政府明白宣示自無繼續之效力而民國報律又未遽行編定頒布茲特規定暫行報律三章即希報界各社一體遵守其文如下 (一)新聞雜誌已出版及今後出版者其發行及編輯人姓名須向本部呈明註冊或就近地方高級官廳呈明咨部註冊茲定自暫行報律頒到之日起截至陽歷四月一號止在此期限內其已出版之新聞雜誌各社須將本社發行及編輯人姓名呈明註冊其以後出版者須于發行前呈明註冊否則不准其發行 (二)流言煽惑關於共和國體有破壞弊害者除停止其出版外其發行人編輯人并坐以應得之罪 (三)調查失實污毀個人名譽者被污毀人得要求其更正要求更正而不履行時經被污毀人提起訴訟訊明得酌量科罰內務部電



咨



大總統咨參議核議借款救濟皖災文

前據財政部總長陳錦濤呈稱華洋義賑會以安徽救急事宜向四國銀行借款請示辦法前來當經飭令該部與該會會商辦理在案茲再據該部長呈稱據該報告災情萬急如十日內無大宗賑款恐災民坐斃日以千數又函稱四國銀行允每星期可借十萬兩分十六星期共借一百六十萬兩以民國財政部收據交銀行存執爲暫時擔保之證與現時南北商妥暫借二百萬之辦法相同竊以該省兵燹偏災紛乘沓至物力凋敝羅掘俱窮今日復接孫都督電請中央撥助願在錢糧項下分年提償其窘急情形亦可想見然恐磋商此項分攤條件緩不濟急可否俯念民生流離倒懸待解借款救濟實爲瞬不容緩之舉迅將全案理由咨交參議院查照尅日議復以蘇民命等因據此理合咨請貴院查照全案理由尅日議復以便施行事關民命幸勿遲誤此咨



令示

大總統令江蘇都督核辦鹽城上岡鎮紳馮滋深等願留鍾志沆仍辦

鹽乞務順輿情呈

茲據鹽城上岡鎮紳學界馮滋深等呈請願留鍾志沆仍辦新興場墾務并列舉該員治績前來爲此令仰該都督查明該員應否留任酌核辦理并將原呈發交此令

大總統批籌辦全皖工振事務盧安澤等呈

皖省災情之重爲數十年所僅見居民田園淹沒妻子仳離老弱轉於溝壑丁壯莫保殘喘本總統忝爲公僕實用疚心前據財政部呈稱華洋義賑會擬向四國銀行借款救濟當經批令該部派員與借主商訂一切條件矣仰卽知照此批

大總統批陸軍部呈報勳章式樣及章程請核准施行由

據呈已悉勳章所以酬庸勸士亟應制定頒行以勵有功該部所擬勳章章程及形式尙屬妥善應准頒行唯勳章着綬之處宜在背面無爲環于頂而懸之者仰卽改良盡善再行發製可也此批

大總統批南京府知事方潛辭職呈

呈悉該知事奔走國事夙著賢勞前由內務部荐任南京府知事方冀從容布施茲閱呈力辭今職情詞肫摯自應准予所請已令行內務部薦員接任矣此批

大總統批江甯自治公所等呈

呈悉南京府知事方潛現由安徽都督孫統筠電調赴皖襄助要政並據方潛來呈力辭今職已令行內務部荐員接任矣仰卽知照此批

大總統批唐慶鏞爲憑權恣虐訴求批行審判併案訊究呈

呈悉上級司法機關自有提調人證職權毋庸指令仰卽徑赴該地方檢察廳呈訴可也此批

大總統批鹽城上岡鎮紳馮滋深等願留鍾志抗仍辦鹽務呈

據呈已悉候令行江蘇都督查明辦理可也

大總統批江西新城縣武立元等請破除引界定稅運鹽呈

據呈已悉應候令行實業部核辦仰卽知照此批

大總統批江浦縣毛伯龍稟串據朋騙徇情偏斷懇飭檢察廳調案提

質呈

該民人對於判決如有不服可徑赴該管檢察廳上訴果有枉屈不難平反也此批

大總統令內務部許南京府知事方潛辭職薦員接任文

據南京府知事呈稱潛江左下士一介書生少污僞命薄宦淮上痛心北廷腥德棄官之日本結納豪俊謀復諸華嘗膽臥薪不敢或懈奔走革命亦有年矣天厭虜德漢上師興素旄一揚區宇混一潛之初志於是乎遂本當肥遯浚谷抱璞保真爲共和國民以終老當金陵初下中原未復時大總統不以潛爲不肖委以今職區夏鼎沸百務待舉之際身爲黨人自不能不勉從諸賢之後以濟艱難然而服官非潛志也今幸南北統一中夏安定袁大總統將次南來隆平之治庶幾可望潛以菲材忝茲重任若不自引退以讓賢者不特隕越貽羞有傷總統之明亦有背潛之初志伏望總統別舉賢才俾潛得優游林下則實南京百姓無疆之休非僅潛一人之私幸等情前來查該知事奔走國事夙著賢勞前由該部薦任南京府知事方冀從容布施茲閱來呈力辭今職情詞肫切自應准予所請合行令仰該部遵照薦員接任可也此令

大總統令陸軍部准予建立楊鄭二烈士專祠並附祀吳熊陳三烈士

文

據陸軍部呈覆案查光復軍總司令李燮和呈請醴陵楊烈士卓林長沙鄭烈士子瑜同

忠國事同爲端方所害同死江甯地方請以太平門外玄武湖端方私建之房屋一所作爲二烈士祠並請除該所房屋有無附屬產業容再查明另呈附入該祠以作歲修祭費外酌給撫卹銀兩以存忠裔一案奉總統批陸軍部核辦等因奉此祇領之下遵卽交本部軍衡局議去後旋據該局長督同科員逐一調查該二烈士一駢死於丁未二月一瘐死於庚戌八月見殘於一人就義於一地被禍既烈身後尤極蕭條先後報告前來實與原呈一轍經本部覆查無異以之撥作祠堂並各酌給卹銀壹千兩撥與彰善瘴惡公理尙無不合理合具文申請總統准予立案撥給批示遵行以恤孤寒而彰忠烈實爲公便再吳越熊成基安徽人楊篤生湖南人前均謀炸端方未得一逞迨吳震以一擊熊舉烽燧於大江之涘楊痛黃花岡之大功不就於英島蹈海以殉亡身報國與楊鄭二烈士先後合符事同一律可否援例共祀一祠並照給卹銀以存忠裔之處出自鈞裁感深存歿等情前來按民國締造之功匪一手足之烈覩茲燦爛之國徽盡係淋漓之血跡以上諸烈士或謀未遂而身赴西市或難未發而瘐死囹圄或奮鐵彈之一擊或舉義旗於萬夫或聲嘶去國之吟或身繼蹈海之烈死事既屬同揆廟食允宜共饗該部所請事屬可

行尙有陳烈士天華前後屢圖義舉均未獲就發憤著書凡數十萬言皆發揚民族之精義至今家有其書此次義師一呼萬方響應實由民族學說灌輸人心已歷朝夕故銅山崩而洛鐘應光復大業期月告成考陳烈士與楊烈士生平最友善其蹈海事蹟亦復相同允宜一體同祀并照給卹銀合就令仰該部遵照辦理可也

大總統令內務部通飭禁烟文

鴉片流毒中國垂及百年推其爲禍之烈小足以破業殞身大足以亡國滅種前清末年禁種征膏成效漸著吸者漸減民國始建軍務倥傯未暇顧及他務誠恐狡商猾吏因緣爲奸弁髦舊章復萌故態夫明德新民首滌汚俗矧鴆毒厚疾可懷苟安除申告天下明示禁止外爲此令仰該部迅查前清禁煙各令其可施行者卽轉咨各都督通飭所屬仍舊厲行勿任弛廢其有應加改良及未盡事宜并著該部悉心籌畫擬一暫行條例頒飭遵行務使百年病根一旦拔除強國保種有厚望焉切切此令

教育部批光復軍總司令李燮和請將光復軍女子隊改組女學堂酌給開辦常年經費並請出示保護呈

據呈已悉該司令擬將女子隊改組學堂係爲振興教育起見事屬可行惟本部甫經成立財力未充所請酌給經費一節應暫緩議至韜園能否撥作校址非本部分行政範圍以內之事仰自行呈請內務部核准後再由本部出示保護以清權限而維學務此批

教育部批元甯公立幼女學堂堂長鄧雲鵬呈報開學並請行知南京府給示保護呈

據呈已悉已行知南京府給示保護矣此批

教育部批南京鍾英中學校畢業生馬震華請由美國交還賠款項下撥費留學日本呈

據稟已悉查美國退還賠款約明專充派遣留美學生之用不能移作留日學生學費況此宗款項向由前清外務部與學部合設之游美學務處經理現在南北雖已統一本部尙未將此事接收所請撥款一節應無庸議此批



紀事

財政部致各省都督澈查各州縣徵存稅款電文

各省都督鑒民軍起義以來各州縣徵存稅款未能完解者頗多難保無侵蝕挪用等弊現在大局已定亟應從事整理以清公款希即從速澈查報部核辦

財政部致各省都督調查賦稅已徵未徵停徵各項限日列表報部電文

各省都督鑒各省各項賦稅自民國成立至今何項已經徵收何項尚未啓徵何項停徵數月何項實未停徵亟應分別調查以資整頓希即督飭所屬限日列表具報咨部查核除將表式擬定咨送外特先電聞

財政部致各省都督於歲入項下通籌撥解若干電文

各省都督鑒現在民國成立庶政待舉籌餉尤亟中央擔負太重財政竭蹶自不待言貴省如能設法務希不分內外於歲入項下速即通籌撥解以應要需能解若干乞先電覆交通部整理電報局通告各省電文

北京新舉袁總統武昌黎副總統各省都督均鑒頃據上海電政局電稱本局向設在上海爲全國電政總機關上海光復後即由民軍管理並先後蒙各省都督承認數月以來

本局於各省被毀路線已分別派員修通各局請撥材料報告以及款項亦無不設法籌濟其餘水線公司交涉尤爲困難就幸範圍藉保權利現當南北一致漢口北軍所設電局亦與本局接洽應請大部通電南北各省凡遇電政一切事宜一律以本局爲完全總機關俾便整頓而免歧異並乞示遵等語本部查該局因各國水線公司皆在上海按期向我國結算全國報費並京津滬福廈港等水線各項交涉繁重故電政機關仍以在滬爲便利現南北既已統一電報爲全國交通要政尤當整齊劃一以求靈捷現擬關於電報派用人員以及修設線路需用材料並解款冊報等項此後概由該總局直接管理彙總報部以期統一而免阻礙所有南北各省線路損壞之處卽飭該局速行修理除呈明大總統外相應電請貴處通飭遵照並乞電覆

陸軍部爲建先烈專祠事表揚閩都督慷慨大公電文

各省都督均鑒竊維賞賢議功爲建邦之大典彰善癉惡乃心理所同然本部前以民國統一所有先後死義諸先烈應由各省建設專祠永遠奉祀繼思各省財力恐未能即時舉行因查前清昭忠等祠多係公家建造擬以改祀民國忠烈建造之費既省賞罰之義

自昭業經通電在案茲准福建孫都督電開先父開化於前清甲申之役在台北戰勝法蘭西保全中國土地故於閩省得建專祠其建造之費由仁自行籌措外附昭忠祠一所係同軍人合建以祭祀將士之捍衛同胞者現奉電示仁忝爲閩省長官自應恪守命令首先遵照取消兩祠名目將祠廬交政務院照部議辦理惟祠後住宅一所係仁自建向作家屬寄寓之所茲當祠宇歸公住屋亦當報効入官等因查甲申之役孫公開化戰勝法軍於台北賴以保全國土有功於中華民國良非淺鮮似非與曾左胡李輩爲覺羅一氏之功臣者所可比例况孫公專祠爲私款所造尤屬不在此例而孫都督但知崇先烈之偉績傷忠魂之無依舉以奉祀且將家人住宅一并歸公慷慨懇一秉大公誠爲人所難能欽佩曷極除電孫都督請以孫公開化仍入祀忠烈祠以免湮沒並祠後屋宇照舊留作家屬住宅外特此通電表揚用彰公道而資表率陸軍部江

交通部致長江各都督通飭所屬保護招商局輪船電文


武昌黎副總統南昌馬都督安慶孫都督蘇州莊都督均鑒南北聯合時局大定長江流域行旅商貨急宜流通已飭招商局輪船於二十九日起照常開駛應請尊處通飭沿江

各屬民政兵警一體保護以維航業禱切盼切交通部冬

大本營總兵站通佈各司令凡軍隊出發須於六時前知照甯省路局

文

爲通佈事昨准陸軍部函開准交通部咨開據甯省鐵路總局整頓辦法時刻呈稱竊總理接辦之初經卽擬定開車時刻及往來次數無如各軍隊雲集都城往來上下實繁有徒軍械軍裝動以萬計每站多停數分鐘則全路遲延半點嗣後自當督飭客車按時開行凡關於軍隊往來務於六點以前由大本營知照路局總管俾便備辦倘車輛不敷尙可向滬甯租賃如此籌措庶於搭客軍士兩無妨碍各等情據此相應函請出示等由准此除出示曉諭軍民人等遵照外相應通佈貴軍司令希煩查照轉飭各軍隊知照



雜報



教育部收買古籍廣告

本部現擬籌設中央圖書館應儲書籍甚多各處如有古籍願出售者除星期外請於每日下午三時至五時持樣本至南京碑亭巷本部接洽如合意者本部當給以相當價值

臨時政府公報 附錄

中華民國元年三月六日星期三

隨報附出 不另徵費



電報



孫大總統黃陸軍總長北京袁大總統武昌黎副總統均鑒上海光復兼克製造局均囑
李君鍾珪督率商團冒險進取協助革軍得以全局入手紳商各界公推李君擔任局長
事務李君素抱利國福民宗旨慨盡義務軍興後日夜趕造軍械接濟南北各軍並親率
本局炮隊攻克金陵四月以來夙夜焦勞內籌經費外保治安偉績豐功中外欽仰現李
君以心力交瘁決意辭局長之職呈請另委同人等揆時度勢製造局務不特李君在局
提調十有餘年熟悉情形未便聽其辭退即光復後保全大局南省人民同聲感戴當此
統一初定民氣囂張局中工匠數千附近居民數萬皆視本局動靜以爲安危偷驟易生
手於整頓局務收效尙遲萬一人心不靖擾亂治安關係非淺同人等爲大局起見公懇
電飭李君勿准辭職諭令力疾從公一面發給正式委任狀責成李君擔任局長照常任

事地方幸甚大局幸甚上海製造局各廠處委員匠目全體人等敬謹電呈

(上海來電九十四)

大總統陸軍總長鈞鑒今日由大北水綫傳到北京消息稱本日午後二時復有暴動情事當由甫經修竣之本綫電京詢問一切復稱無恙秩序已少定知厘特聞其美叩冬

(上海來電九十五)

孫大總統參議院各部總長黎副總統各省都督晉代表各報館鈞鑒山才力綿薄勉執革鞭力無一成汗顏曷極幸賴全國上下戮力一心民國統一共和目的完全達到於願已足夫復何言况破壞局終建設方始自願駑鈍實非其才刻已電懇晉民公會及諮議局另選賢能來忻接辦一俟繼承得人山即解除兵柄長揖歸田與四百兆同胞共享自由幸福肅此先佈伏希垂諒晉軍都督閻錫山叩蕭

(晉省忻州來電九十一)

大總統鑒西江梗塞粵督委協軍鍾自鳴往撫突被李耀漢橫攻亂甚乞電粵督飭鳴始終其事商人李子乾陳子輝等叩

(武昌來電九十三)

孫大總統鈞鑒兵事凶器自古苦之而禍結兵連尤非得已之舉今我漢族僅以四閱月

之時日犧牲少數人之頭顱而卒於壇坫之間得使滿清退位南北合同恢復大漢之山河擁建共和之日月隆中雖弱而善戰兵士雖猛於從戎而念及在靈之塗炭大局之攸關遙望金陵同申慶祝袁公前此之舉動隆中頗視若仇讎而此次和議之告成自不能不推爲革命之首功我大總統竟棄大權若敝屣授之袁公揖讓高風曷勝欽佩所不滿意者和議條件贖欠料餉亡清皇室私產難以數計我民國當此民窮財盡之際每歲猶必以四百萬金任其揮霍淫奢之用一誤也清帝既經退位自當避居熱河反任其暫居宮禁日後退居頤和園一旦宗社黨聽其鼓動勢必重用干戈二誤也至建都地點暫時極力主張南京外人之觀瞻所係內政之進步有關若遷徙北方亡清之汚俗猶存前此之舊染難化滌瑕蕩垢行之維艱三誤也不揣冒昧敢貢芻蕘務乞我大總統嚴詞以爭力圖補救若爭之不已自必決之兵力隆中亦當私効馳驅是否有當總希電示實爲禱企待命之至湘軍統領官王隆中叩

(長沙來電九十六)



告白

總統府秘書處廣告

現於本府東西柵門外設立揭示處凡來本府投遞呈件者分別事項量予批答揭示該處以三日為限過期揭去嗣後凡來本府投遞呈件人等希一體知照總統府秘書處白

總統府印鑄局啟事

本局自接辦南洋印刷廠後前茅總理乃登所欠洋行暨各員司薪水技師工資並經手借款等項已由局領款如數分別交付清楚用特開單登報俾眾咸知

計開 一付信記洋行紙款規元銀三百兩零 一付茅乃登大洋一千元 一付朱會計開 一付各員司薪水大洋一百五十三元 一付技師藝徒工資大洋六十五元 一付引擎小工資大洋八十元 一付夫役工食大洋四十元 一付（組版裝訂）各課夜工資大洋二百五十八元零 一付廚房大洋八十一元零

統計 規元銀三百兩零
大洋一千九百七十七元零
局長 黃復生 謹啟
副局長 彭丕斯

印鑄局工廠發行所廣告

本局發行所接收伊始所有從前印刷兵學操典及信箋摺券各項現以民國成立各界購用者甚夥刻經酌定減價統限大洋七折出售若有購至二十元以上者以六折計算

如承 賜顧無不竭誠歡迎但所存無多切須爭先購買幸毋觀望自誤 印鑄局謹白

教育部徵集國歌廣告

國歌所以代表國家之性質發揚人民之精神其關係至大今者民國成立尙未有美善之國歌以供國民飄詠良用慙焉本部現擬徵集歌譜俟取材較多再敦請精於斯學者共同審定頒行全國倘蒙海內音樂名家作曲譜並附歌詞郵寄本部不勝企盼之至

教育部謹啟

教育部通告

本部現因學校尙未頒布故於辦理學校之人到部呈請立案者一概從緩批准誠恐外間或有誤會爲此登報聲明嗣後學校經本部批准立案者必以登載公報有准予立案字樣者爲憑此布

臨時政府公報局告白一

各省官廳所有暫行條例命令及職員之任免遷轉等項均希隨時抄送本局其地方自治團體辦理公共事業如道路衛生醫院學校救貧等項之經過及其成績亦可隨時抄

送本局登載公報藉規地方之情況而彰民治之精神

臨時政府公報局告白二

各處有願爲公報販買所者可將領報份數及販買區域本人之氏名年齡職業住所及販買章程呈送本局核定並須酌交保證金其保證之金額由局長定之

臨時政府公報局告白三

嗣後各處定閱本報者須將報費逕寄總統府內臨時政府公報局由本局掣取收條卽飭發行所照寄空函定報概不答覆

本報暫定則例

- 一 本報爲臨時政府刊行故定名爲臨時政府公報
- 二 本報以宣布法令發表中央及各地政事爲主旨
- 三 本報暫定門類六曰法制曰咨曰令示曰紀事曰抄譯外報曰雜報其子目見前
- 四 本報日出一册如遇國家紀念日星期日政府停止辦公時本報亦休刊一日
- 五 政府對於各地所發令示或宣布法律凡載登本報者公文未到以本報到後爲有效
- 六 凡各官署皆有購閱本報之義務唯具印文請領者皆照定價五折徵

納餘另詳前價目表

本報白

本報局設在大總統府內

總發行南京花牌樓太平街四號

分售處南京中華報

南京中正街昇平橋易安精舍

外埠經售處

鎮江 興漢日報

常州大街老王大昌

無錫光復門內新橋二十一號會瑞武

蘇州城內因果巷四十一號許宅

上海

民立報

大共和報

時報

申報

新聞報

天鐸報

時事新報

啓民愛國報

神州報

中外日報

上海寶善街公順里仁和號

蕪湖 民立報分館

廣州 中國日報

香港 軍事報

天津 民意報

舊金山 大同報

中西報

少年報

檀香山 自由新報